



Sesida dals

Communitgà ils

Protocol nr.

20 da december 2022

22 da december 2022

998/2022

Dumonda Metzger

concernent la realisaziun lunga e stentusa da projects da bike

Resposta da la Regenza

Tar la dumonda 1: Tenor l'art. 2 da la Lescha federala davart la planisaziun dal territori (LPT; CS 700) vala in'obligaziun da planisaziun per incumbensas che han in effect sin il territori. Ultra da quai pon edifizis e stabiliments ordaifer la zona da construcziun, che n'èn betg confurms a la zona, vegnir permess mo, sch'els èn liads al lieu e sche nagins interess predominants s'opponan ad els (art. 24 LPT). Ils instruments da planisaziun da la planisaziun dal territori servan a motivar la dependenza dal lieu ed a considerar ils interess pertutgads. L'obligaziun da planisaziun, la consideraziun dals interess e la dependenza dal lieu èn prescripziuns dal dretg federal che ston vegnir applitgadas er per projects da bike. Igl è chaussa dals chantuns da realisar questas prescripziuns conform al stgalim. La pratica per il chantun Grischun, che observa las prescripziuns giuridicas, è descritta en il mussavia «Velos da muntogna e planisaziun dal territori» ch'è vegnì publictà l'onn 2012 e revedì l'onn 2015. Dapi lura n'hai dà midadas ni en la pratica ni en il dretg. Il mussavia resguarda en moda cumplessiva las cundiziuns generalas effectivas e giuridicas e promova l'execuziun efectiva. Tut tenor la complexitad dal project valan differentas pretenziuns: ina inscripziun en il plan directiv regiunal (PDReg) è necessaria mo per la construcziun da novas rutas (vias) da bike cun in basegn da coordinaziun pli grond, er intercommunal. Implants da velos da muntogna sco pistas da downhill e da freeride ubain uschenumnads flowtrails na dovran per regla betg ina basa en il PDReg, dentant ina inscripziun en il plan general d'avertura (PGA) da la vischnanca. Per signalisaziuns sin las vias existentas na dovri tenor l'art. 40 al. 1 da l'Ordinaziun davart la planisaziun dal territori per il chantun Grischun (OPTGR; D 801.110) nagina permissiun.

Ils retards na resultan betg pervia da lungas proceduras, mabain pervia da conflicts territorials. Tranter auter il boom dals e-bikes ha procurà che dapli persunas van cun

velo da muntogna. Quai chaschuna natiralmain er dapli conflicts cun auters interess d'utilisaziun e da protecziun. Igl è pussaivel da gudagnar temp cun chattar soluziuns, sch'ils interess pertutgads vegnan communitgads en moda cumplexsiva ed integrads a temp. Ina metoda per minimar conflicts e pia er per accelerar la procedura è detretschaments territorials, p.ex. cun intensivar l'ir cun velo da muntogna en tschertas parts da la destinaziun ed il viandar plitgunsch en las autras. Questa metoda è adattada là, nua ch'ina coesistenza n'è betg sa cumprovada resp. betg pussaivla u nua ch'ins ha la chaschun da detretschar, perquai ch'i dat avunda vias attractivas. Il PDReg è in instrument adattà per coordinar talas priorisaziuns sin plaun intercommunal. In'otra metoda è detretschaments cun signalisar raits da vias separadas u cun guntgir territoris sensibels. Il PGA è in instrument adattà per francar tals detretschaments, per als legitimar democraticamain e la finala per als fixar en moda lianta per las proprietarias ed ils proprietaris dals bains immobigliars. Senza determinaziuns correspundentas en il PGA stuessan novas vias da velo da muntogna avair ina dependenza dal lieu relativa per pudair vegnir permessas en il rom da la procedura EOZ. En auters chantuns, che n'enconuschan betg il PGA, chaschuna quai regularmain problems ed – en cas da protestas – er retardaments processuals. Sco ch'il barat d'experienceschas a chaschun da diversas dietas spezialisadas (p.ex. al Congress annual da ride a Tavau u a la dieta da graubündenMOBIL davart il traffic betg motorisà) ed en gremis professiunals (p.ex. en la Cumissiun per la planisaziun d'utilisaziun da la Conferenza dals planisaders chantunals) ha mussà, ha il PGA gronds avantatgs sco instrument da planisaziun ed accelarescha la finala schizunt la realisaziun da projects da bike, perquai che tals resistan uschia plitgunsch ad in'examinaziun giudiziala.

Tar la dumonda 2: La regulaziun prescritta è sa cumprovada en la pratica. La Regenza na vesa perquai nagin basegn d'adattar il dretg chantunal vertent. Er en il rom dal dretg federal na sa mussan naginas libertads d'agir che purtassan meglieraziuns. Sin dumonda è l'Uffizi per il svilup dal territori gugent pront da cusseglia e da sustegnair las regions e las vischnancas en lur planisaziuns da projects da bike.



En num da la Regenza

Il president:

Marcus Caduff

Il chancelier:

Daniel Spadin